



Կարգապահական գործ թիվ ԿԳ-25065

Հայաստանի Հանրապետության փաստաբանների պալատի
կարգապահական հանձնաժողովի

Ո Ր Ո Շ ՈՒ Մ

**ՓԱՍՏԱԲԱՆ ՆԱՐԻՆԵ ԲԱԳՐԱՏԻ ՄԿՐՏՉՅԱՆԻՆ ԿԱՐԳԱՊԱՀԱԿԱՆ
ՊԱՏԱՍԽԱՆԱՏՎՈՒԹՅԱՆ ԵՆԹԱՐԿԵԼՈՒ ՀԱՐՑԸ ՔՆՆԱՐԿԵԼՈՒ ՄԱՍԻՆ**

Հայաստանի Հանրապետության փաստաբանների պալատի կարգապահական հանձնաժողովը (**այսուհետ նաև՝ Հանձնաժողով**), Հանձնաժողովի նախագահ՝ Տաթևիկ Շալջյանի, Հանձնաժողովի ղեկուցող անդամ՝ Կարեն Խալաթյանի, Հանձնաժողովի անդամներ՝ Վերոնիկա Ալեքսանյանի, Միքայել Դանիելյանի և Արաքս Վարդանյանի կազմով,

քարտուղարությամբ՝ Մերի Տերտերյանի,

մասնակցությամբ՝ Նարինե Մկրտչյանի ներկայացուցիչ, փաստաբան՝ Թամարա Գրիգորյանի,

քննության առնելով փաստաբան Նարինե Բագրատի Մկրտչյանի (արտոնագիր՝ թիվ 2479) (**այսուհետ միասին նաև՝ Փաստաբան կամ Պատասխանող**) կարգապահական պատասխանատվության ենթարկելու վերաբերյալ հարցը՝

Պ Ա Ր Զ Ե Ց՝

1. Կարգապահական վարույթ հարուցելու առիթը և հիմքը.

Սարգիս Ալեքյանը (**այսուհետ նաև՝ Դիմող**), դիմելով Հայաստանի Հանրապետության փաստաբանների պալատ (**այսուհետ նաև՝ Պալատ**), հայտնել է, որ 2023 թվականի հունիսի 30-ին փաստաբան Նարինե Մկրտչյանի հետ կնքել է ծառայությունների մատուցման պայմանագիր (**այսուհետ նաև՝ Պայմանագիր**): Պայմանագրի գինը կազմել է 250.000 ՀՀ դրամ, որից 140.000 ՀՀ դրամը վճարել է պայմանագրի կնքման օրը, այսուհետև 2024 թվականի նոյեմբերին վճարել է ևս 20.000 ՀՀ դրամ: Փաստաբանը չի կատարել իր պարտականությունները, դրսևորել է անգործություն, չի իրազեկել գործի ընթացքի մասին և գրեթե չի պատասխանել նամակներին և հեռախոսազանգերին: Դիմողը ստիպված է եղել ժառանգության ընդունման գործընթացն ինքնուրույն իրականացնել:

Դիմողը ներկայացրել է 28.06.2023 թվականին տրված լիազորագրի, 30.06.2023 թվականին կնքված պայմանագրի և անձնագրի պատճենները:

Թիվ ԿԳ-25065-2-Ա
16.07.2025թ.



Դիմողը խնդրել է քննարկել Փաստաբանին կարգապահական պատասխանատվության ենթարկելու հարցը և պարտավորեցնել վերադարձնել իր կողմից վճարված 160.000 ՀՀ դրամը:

Միաժամանակ, սույն կարգապահական վարույթի օրինականությունն ապահովելու և արդարացի լուծման համար նշանակություն ունեցող հանգամանքները բացահայտելու նպատակով՝ 21.04.2025 թվականին Դիմողին առաջարկվել է գրությունը ստանալու պահից մեկշաբաթյա ժամկետում ներկայացնել կարգապահական վարույթի համար անհրաժեշտ ապացույցներ, սակայն Դիմողը որևէ դիրքորոշում կամ ապացույց չի ներկայացրել:

2. Պատասխանողների համառոտ բացատրությունները.

Մինչև կարգապահական վարույթ հարուցելու հարցի լուծումը փաստաբան Նարինե Մկրտչյանին առաջարկվել է ներկայացնել բացատրություն Սարգիս Ալեքյանի դիմումի վերաբերյալ, սակայն Փաստաբանը բացատրություն չի ներկայացրել:

Միաժամանակ, սույն կարգապահական վարույթի օրինականությունն ապահովելու և արդարացի լուծման համար նշանակություն ունեցող հանգամանքները բացահայտելու նպատակով՝ 21.04.2025 թվականին Փաստաբաններին առաջարկվել է՝ «Փաստաբանության մասին» օրենքի (այսուհետ նաև՝ Օրենք) 39.5 հոդվածի 5-րդ մասին համապատասխան, գրությունը ստանալու պահից մեկշաբաթյա ժամկետում ներկայացնել կարգապահական վարույթի համար անհրաժեշտ ապացույցներ:

Փաստաբանը 30.04.2025 թվականի բացատրությամբ հայտնել է, որ Դիմողը խնդրանքով վերադարձրել է նրան գործին առնչվող փաստաթղթերը:

Փաստաբանը հավելել է, որ Պայմանագրի շրջանակներում Դիմողը ստացել է ժառանգության իրավունքի վկայագիր, որը ստանալու ընթացքում Փաստաբանի կողմից կատարվել են անհրաժեշտ գործողություններ՝ ուղղված փաստաթղթերում առկա անճշտությունները վերացնելուն, իսկ ժառանգության վկայագիրը Դիմողը ստացել է անձամբ:

Ըստ Փաստաբանի՝ Դիմողը չի վճարել ծառայության գումարի մասը, այնուհետև ցանկացել է լուծել պայմանագիրը: Փաստաբանն առաջարկել է Դիմողին ներկայանալ գրասենյակ պայմանագրի լուծման համար, սակայն վերջինս գրասենյակ ներկայանալու փոխարեն դիմել է Պալատ:

Փաստաբանը հերքել է իրեն վերագրվող՝ Դիմողի զանգերին չպատասխանելու արարքի կատարումը:

Հանձնաժողովի նիստին Փաստաբանն ըստ էության պնդել է նախկինում ներկայացված դիրքորոշումը՝ հավելելով, որ պայմանագրի առարկան ձևակերպվել է ելնելով այն հանգամանքից, որ Դիմողն ունեցել է որոշ տարածայնություններ իր քրոջ հետ, իսկ կատարման ենթակա աշխատանքն առավելապես կապված է եղել արտադատական ընթացակարգերի հետ:

Միաժամանակ, Փաստաբանը հայտնել է նաև, որ Դիմողը բնակվում է գրասենյակին մոտ և անհրաժեշտության դեպքում անձամբ այցելել է Փաստաբանին:

3. Կարգապահական վարույթ հարուցելու մասին որոշումը.



Պալատի նախագահի 27.03.2025թ. թիվ 131-Ա/ԿԳ-25065 որոշմամբ **փաստաբան Նարինե Մկրտչյանի** նկատմամբ հարուցվել է կարգապահական վարույթ՝ Օրենքի 19-րդ հոդվածի 1-ին մասի 1-ին և 2-րդ կետերի, ինչպես նաև **Պալատի ընդհանուր ժողովի 2019 թվականի հոկտեմբերի 19-ի թիվ 1-Լ որոշմամբ հաստատված փաստաբանի վարքագծի կանոնագրքի (այսուհետ նաև՝ Կանոնագիրք) 2.7.2, 3.5.5 և 3.6.1** ենթակետերի խախտման հատկանիշներով:

01.04.2025թ. կարգապահական գործի նախապատրաստումը հանձնարարվել է Պալատի աշխատակազմի սպասարկող անձնակազմի աշխատակից Ծովինար Քուրքյանին (այսուհետ նաև՝ Աշխատակից):

3.1. Վկաների ցուցմունքները.

Սույն կարգապահական գործով վկաներ չեն հրավիրվել:

4. Կարգապահական գործ նախապատրաստող Աշխատակցի եզրակացությունը և գործի հանձնումը Հանձնաժողովին.

Գործի նախապատրաստման արդյունքում Աշխատակիցը 30.05.2025թ. կազմել է եզրակացություն:

Եզրակացությամբ հաստատված են համարվել սույն որոշման 5-րդ գլխի 1-3-րդ կետերում նշված փաստերը:

Հանձնաժողովի նիստերը տեղի են ունեցել 25.06.2025թ. ժամը 19:30-ին, 16.07.2025թ. ժամը 18:30-ին՝ ՀՀ փաստաբանների պալատի վարչական շենքում (ք.Երևան, Զաքյան 7-2, 4-րդ հարկ, թիվ 12 սենյակ):

5. Գործի հանգամանքները՝ առկա ապացույցների վկայակոչմամբ.

Հանձնաժողովը, ուսումնասիրելով գործում առկա ապացույցները, հաշվի առնելով նաև կարգապահական գործը նախապատրաստող Աշխատակցի եզրակացությունը, հաստատված է համարում հետևյալ փաստերը.

1. Փաստաբանը ստանձնել է Դիմողի իրավունքների պաշտպանությունը: **Սույն փաստը հաստատվում է կողմերի բացատրությամբ, ինչպես նաև 30.06.2023թ. փաստաբանական ծառայությունների մատուցման թիվ 27-32 պայմանագրով:**

2. Պայմանագրի համաձայն՝ Կատարողը պարտավորվել է հանդես գալ որպես լիազորված անձ ՀՀ բոլոր դատական ատյաններում: **Սույն փաստը հաստատվում է 30.06.2023թ. փաստաբանական ծառայությունների մատուցման թիվ 27-32 պայմանագրով, ինչպես նաև 28.06.2023 թվականի լիազորագրով:**

3. Պայմանագրից բխող գործողությունների կատարման կապակցությամբ Փաստաբանը չի տեղեկացրել Դիմողին: **Սույն փաստը հաստատվում է Դիմողի բացատրությամբ: Միաժամանակ, չնայած Փաստաբանը հերքել է նշված հանգամանքը, այնուամենայնիվ, չի ներկայացրել որևէ ապացույց:**

6. Պատասխանողի անձը բնութագրող հանգամանքները.



Պալատի աշխատակազմի ղեկավարի կողմից տրված տեղեկանքների համաձայն՝ **Նարինե Բագրատի Մկրտչյանը** փաստաբան է հանդիսանում 23.10.2018 թվականից և 2020-2025թթ ընկած ժամանակահատվածում չունի կարգապահական տույժ:

7. Պալատի Հանձնաժողովի պատճառաբանված եզրակացությունը և որոշումը.

Հանձնաժողովը գտնում է, որ փաստաբան **Նարինե Բագրատի Մկրտչյանը** ենթակա է կարգապահական պատասխանատվության Օրենքի 19-րդ հոդվածի 1-ին մասի 1-ին և 2-րդ կետերի, ինչպես նաև Կանոնագրքի 2.7.2, 3.5.5 և 3.6.1 ենթակետերի խախտման համար հետևյալ պատճառաբանությամբ՝

Օրենքի 19-րդ հոդվածի 2-րդ կետի համաձայն՝ փաստաբանը պարտավոր է պահպանել նույն օրենքի, փաստաբանի վարքագծի կանոնագրքի և փաստաբանների պալատի կանոնադրության պահանջները:

Օրենքի 39-րդ հոդվածի 1-ին մասի համաձայն՝ փաստաբանը ենթակա է կարգապահական պատասխանատվության սույն օրենքի և փաստաբանի վարքագծի կանոնագրքի պահանջները խախտելու համար, ... :

Օրենքի 39-րդ հոդվածի 2-րդ մասի համաձայն՝ Փաստաբանի նկատմամբ կարգապահական վարույթն իրականացվում է օրինականության, օրենքի և փաստաբանների պալատի առջև հավասարության, մրցակցության, կատարված կարգապահական խախտման համար նշանակվող կարգապահական տույժի համաչափության և անմեղության կանխավարկածի սկզբունքների հիման վրա:

Օրենքի 39.1-ին հոդվածի 1-ին մասի 1-ին և 2-րդ կետերի համաձայն՝ փաստաբանին կարգապահական պատասխանատվության ենթարկելու հիմքերն են՝ սույն օրենքի պահանջների խախտումը, որը կատարվել է դիտավորությամբ կամ կոպիտ անփութությամբ, ինչպես նաև փաստաբանի վարքագծի կանոնագրքի պահանջների խախտումը, որը կատարվել է դիտավորությամբ կամ կոպիտ անփութությամբ:

Օրենքի 39.1-ին հոդվածի 5-րդ մասի համաձայն՝ Փաստաբանը ենթակա չէ կարգապահական պատասխանատվության մեղքի բացակայության դեպքում:

Օրենքի 39.1-ին հոդվածի 6-րդ մասի համաձայն՝ կարգապահական խախտման համար փաստաբանը համարվում է անմեղ, քանի դեռ նրա մեղքն ապացուցված չէ սույն օրենքով սահմանված կարգով՝ Կարգապահական հանձնաժողովի՝ կարգապահական պատասխանատվության ենթարկելու մասին ուժի մեջ մտած որոշմամբ: Փաստաբանի կատարած կարգապահական խախտման վերաբերյալ չփարատված կասկածները մեկնաբանվում են փաստաբանի օգտին:

Օրենքի 39.9-րդ հոդվածի 1-ին մասի 1-ին կետի համաձայն՝ Փաստաբանների պալատի կարգապահական հանձնաժողովը կարճում է փաստաբանին կարգապահական պատասխանատվության ենթարկելու վերաբերյալ վարույթն այն դեպքում, երբ՝ առկա չէ կարգապահական պատասխանատվության ենթարկելու հիմք:

Ներկայացված նորմերի համադրության և վերլուծության արդյունքում կարելի է փաստել, որ Օրենքով սահմանված են որոշակի վավերապայմաններ, որոնց առկայության դեպքում միայն կարգապահական վարույթի շրջանակներում կարող է քննարկվել փաստաբանին կարգապահական պատասխանատվության ենթարկելու



հարցը: Նշված վավերապայմաններն իրենց հերթին ենթադրում են փաստաբանի վարքագծում Օրենքի և Կանոնագրքի պահանջների խախտման առկայությունը, որը կատարվել է դիտավորությամբ կամ կոպիտ անփութությամբ:

Ընդ որում, նման վավերապայմանների ամրագրումն ինքնանպատակ չէ և ըստ էության նպատակաուղղված է կարգապահական վարույթի իրականացմանը՝ օրինականության, հավասարության, մրցակցության, համաչափության և անմեղության կանխավարկածի սկզբունքների հիման վրա:

Այս համատեքստում, կարգապահական վարույթի շրջանակներում առանձնակի նշանակություն է ձեռք բերում փաստաբանի վարքագծում համապատասխան խախտումների հատկանիշների առկայության ապացուցման հանգամանքը, ինչի անտեսումը կամ չապահովումը թույլ է տալիս եզրակացնել փաստաբանի վարքագծում առերևույթ խախտման հատկանիշների բացակայության մասին, քանի որ դրանք չեն հաստատվել վարույթի ընթացքում: Ըստ այդմ՝ յուրաքանչյուր կողմ պարտավոր է ապացուցել իր կողմից վկայակոչված հանգամանքները, կրում է դրանք ապացուցված չլինելու բացասական հանգամանքները, իսկ փաստաբանի կատարած կարգապահական խախտման վերաբերյալ չփարատված կասկածները մեկնաբանվում են վերջինիս օգտին:

Վերոնշյալի հաշվառմամբ, Հանձնաժողովը գտնում է, որ կարգապահական պատասխանատվության հիմք չի կարող լինել միայն ենթադրյալ իրավախախտման մասին դիմողի պնդումը, որը հիմնավորված չէ այնպիսի հանգամանքների վկայակոչմամբ և (կամ) ապացույցներով, որոնք հաստատապես կվկայեն փաստաբանի կողմից Օրենքի կամ Կանոնագրքի պահանջների խախտման կատարման մասին:

Դիմողներն, ըստ էության, Փաստաբանին վերագրում է բարեխիղճ իրավաբանական օգնություն ցույց չտալու և վստահորդի վստահությունը չարաշահելու վարքագիծը:

Վերոգրյալի համատեքստում, Հանձնաժողովը անհրաժեշտ է համարում անդրադառնալ, մասնավորապես, հետևյալ հարցին.

• **Արդյո՞ք փաստաբան Նարինե Մկրտչյանը բարեխիղճ իրավական օգնություն է ցուցաբերել Դիմողին.**

• **Արդյո՞ք փաստաբան Նարինե Մկրտչյանը կանոնավորապես տեղեկացրել է Դիմողին հանձնարարության կատարման ընթացքի մասին:**

Սույն կարգապահական գործի շրջանակներում Դիմողների և Փաստաբանների կողմից ներկայացված բացատրությունների և ապացույցների ուսումնասիրության արդյունքներով Հանձնաժողովի կողմից արձանագրվել է, որ Փաստաբանը ստանձնել է Դիմողի իրավունքների պաշտպանությունը, ինչի կապակցությամբ վերջիններիս միջև 30.06.2023 թվականին կնքվել է փաստաբանական ծառայությունների

մատուցման

թիվ

27-32 պայմանագիր, որի համաձայն՝ Փաստաբանը պարտավորվել է հանդես գալ որպես լիազորված անձ ՀՀ բոլոր դատական ատյաններում կապված ժառանգության ընդունման հետ, ինչի կապակցությամբ Դիմողը վճարել է որոշակի գումար: Նշվածի կապակցությամբ Փաստաբանին 28.06.2023 թվականին տրվել է լիազորագիր՝ Դիմողի անունից պետական մարմիններում և դատական ատյաններում հանդես գալու համար:



Օրենքի 19-րդ հոդվածի 1-ին մասի 1-ին և 2-րդ կետերի համաձայն՝ փաստաբանը պարտավոր է՝ ազնվորեն և բարեխղճորեն պաշտպանել վստահորդի իրավունքները և օրինական շահերը Հայաստանի Հանրապետության օրենսդրությամբ չարգելված բոլոր միջոցներով ու եղանակներով, ինչպես նաև պահպանել Օրենքի, փաստաբանի վարքագծի կանոնագրքի և փաստաբանների պալատի կանոնադրության պահանջները:

Կանոնագրքի 2.7.2-րդ ենթակետի համաձայն՝ փաստաբանը պարտավոր է վստահորդին բարեխիղճ իրավական օգնություն ցույց տալ իր մասնագիտական կարողությունների սահմաններում, ինչը ենթադրում է իրավունքի համապատասխան ճյուղի իմացություն, վստահորդի հանձնարարությանը վերաբերող բոլոր հանգամանքների ուսումնասիրություն, հանձնարարության պարզաճ կատարման համար անհրաժեշտ գործողությունների կատարում:

Կանոնագրքի 3.5.5-րդ ենթակետի համաձայն՝ փաստաբանը պարտավոր է վստահորդին իրավաբանական օգնություն ցույց տալիս իր մասնագիտական պարտականությունները կատարել ողջամտորեն, բարեխղճորեն, որակավորված, սկզբունքայնորեն և ժամանակին, ինչը ներառում է՝

ա. նյութերի ուսումնասիրությունը,

բ. վերաբերելի իրավական ակտերի ուսումնասիրությունը,

գ. վստահորդին վերջինիս հանձնարարության կատարման կապակցությամբ հնարավոր իրավական հետևանքների առաջացման մասին իրազեկումը,

դ. վստահորդի հանձնարարության պարզաճ կատարման համար անհրաժեշտ գործողությունների կատարումը:

Կանոնագրքի 3.6.1-ին ենթակետի համաձայն՝ Փաստաբանը պարտավոր է կանոնավորապես տեղեկացնել վստահորդին հանձնարարության կատարման ընթացքի մասին և պատասխանել նրան հետաքրքրող հարցերին:

Փաստաբանի մասնագիտական բարձր որակավորումը և իր պարտականությունների բարեխիղճ կատարումը փաստաբանության ինստիտուտի հանրային ընկալման առանցքային տարրերից են, որոնց բացակայությունն արժեզրկում է փաստաբանի՝ որպես իրավապաշտպան և արդարադատության կայացմանը նպաստող գործառույթներ իրականացնող անձի հասարակական նշանակությունը:

Նշվածով պայմանավորված, Օրենքով և Փաստաբանի վարքագծի կանոնագրքով փաստաբանի համար սահմանվում են նաև մի շարք այլ պարտականություններ, որոնց շարքում առանձնակի նշանակություն ունի բարձր մասնագիտական պատրաստվածությունը և անհրաժեշտ գործնական փորձի առկայությունը, որի հետ էլ փոխկապակցված է վստահորդի նպաստավոր շահերից ելնելու և բարեխղճորեն և ժամանակին վստահորդի իրավունքներն ու օրինական շահերը պաշտպանելու պարտականության պատշաճ կատարումը:

Ընդ որում, խոսքը վերաբերում է այնպիսի գործողությունների կատարմանը, որոնք փաստացի բխում են կնքված պայմանագրի որոշակի առարկայից կամ վստահորդի կողմից տրված հստակ հանձնարարությունից, և արդյունավետ են վստահորդի իրավունքների, ազատությունների և օրինական շահերի պաշտպանության պատշաճ ներկայացման համար, ինչի հետ էլ փոխկապակցված է փաստաբանի և իր վստահորդի



միջև հարաբերություններում անհրաժեշտ որոշակիության և կանխատեսելիության ապահովումը:

Ըստ այդմ, փաստաբանի համար սահմանվում է նաև այլ պարտականություն, որը ենթակա է պահպանման հանձնարարության կատարման ընթացքում, այն է՝ կանոնավորապես տեղեկացնել հանձնարարության կատարման ընթացքի մասին:

Տվյալ դեպքում, անդրադառնալով Փաստաբանի վարքագծում վերը նշված պահանջների խախտմանը, Հանձնաժողովն արձանագրում է, որ Դիմողի և Փաստաբանի միջև կնքվել է պայմանագիր, որը ունեցել է հստակ առարկա: Ըստ այդմ, Փաստաբանը պարտավոր է ապահովել հանձնարարության կատարումը այդ առարկային համապատասխան:

Չնայած պայմանագրի առարկան որոշակի չէ և դրանից պարզ չէ, թե ինչ բովանդակություն պետք է ունենար գործը, այնուամենայնիվ, կարգապահական գործի շրջանակներում կողմերի ներկայացված դիրքորոշումներից պարզ է, որ այն վերաբերում է ժառանգության ընդունման հարցին, իսկ տրված լիազորագրով Փաստաբանը լիազորվել է հանդես գալ Դիմողի անունից ինչպես մի շարք պետական մարմիններում, այնպես էլ դատական ատյաններում, ինչն առնվազն վկայում է այն մասին, որ գործով նախատեսվել է Դիմողի շահերը պաշտպանել դատական կարգով:

Այս համատեքստում, կողմերը ներկայացրել են հակասական պնդումներ, որոնց հաշվառմամբ ի վերջո պարզ չէ, թե փաստացի ինչ գործողություններ է կատարել Փաստաբանն իրեն տրված հանձնարարության կապակցությամբ:

Հանձնաժողովն արձանագրում է, որ Փաստաբանից պահանջվել են ապացույցներն առ այն, որ նա պատշաճ կերպով կատարել է ստանձնած պարտականությունները, սակայն վերջինս չի ներկայացրել որևէ ապացույց այն հիմնավորմամբ, որ գործի վերաբերյալ բոլոր փաստաթղթերը հանձնել է Դիմողին և իր մոտ այլ փաստաթուղթ առկա չէ:

Այս կապակցությամբ հարկ է փաստել, որ **Կանոնագրքի 2.11.2 ենթակետի համաձայն՝ Փաստաբանական գործի պահպանման նվազագույն ժամկետը սահմանվում է երեք տարի՝ գործի ավարտից հետո: Փաստաբանական գործը կարող է պահվել էլեկտրոնային եղանակով:**

Նշված կանոնից հստակ հետևում է փաստաբանական գործի վարման ու պահպանման պահանջը, ինչը որևէ կերպ չի խոչընդոտում Դիմողին վերադարձնել նրա կողմից տրամադրված կամ Փաստաբանի կողմից ձեռքբերված փաստաթղթերը: Ըստ այդմ, դրա հաշվառմամբ, Փաստաբանն առնվազն պարտավոր է պահպանել Դիմողի փաստաբանական գործը, որպիսի պայմաններում նույնիսկ եթե տրամադրեր Դիմողին վերջինիս փաստաթղթերը, ապա միևնույն է պետք է իր մոտ պահպաներ գործի նյութերի պատճենները, ինչով պայմանավորված էլ կունենար հնարավորություն տրամադրել կարգապահական գործի շրջանակներում նրանից պահանջված նյութերը:

Հենց այդ փաստաթղթերի առկայության պայմաններում կարելի էր հաստատված համարել Դիմողին որևէ ծառայություն մատուցված լինելու փաստը, մինչդեռ հակառակ պայմաններում, ստացվում է, որ Փաստաբանը ստանձնել է Դիմողի շահերի պաշտպանությունը, սակայն այդ կապակցությամբ որևէ գործողություն չի կատարել իսկ



որոշ գործողությունների կատարման վերաբերյալ ներկայացնում է միայն իր պնդումները, ինչն առնվազն բավարար չէ բարեխիղճ իրավական օգնություն ցույց տալու Փաստաբանի պարտականությունն ապահովված համարելու համար:

Անդրադառնալով հանձնարարության կատարման ընթացքի մասին Դիմողին կանոնավորապես չտեղեկացնելու Փաստաբանի վարքագծին՝ Հանձնաժողովն արձանագրում է, որ այդ մասով ևս գործում առկա չէ որևէ ապացույց առ այն, որ Դիմողի և Փաստաբանի միջև առկա է եղել որոշակի կապ:

Ընդ որում, Հանձնաժողովը հարկ է համարում ընդգծել, որ չնայած Փաստաբանը հղում է կատարում այն հանգամանքին, որ Դիմողը բնակվել է գրասենյակին մոտ և անհրաժեշտության դեպքում անձամբ այցելել է Փաստաբանին՝ ստանալով պարզաբանումներ, այնուամենայնիվ, կարգապահական գործի հանգամանքներն այնպիսին են, որ Դիմողի և Փաստաբանի հաղորդակցվելու փաստը որևէ կերպ հնարավոր չէ հաստատել:

Ավելին, բոլոր այն դեպքերում, երբ խոսքը գնում է հանձնարարության կատարման վերաբերյալ, ապա դրա ընթացքում Փաստաբանն առնվազն պարտավոր է իր վստահորդին հայտնել այն նվազագույն տեղեկատվությունը, որն անհրաժեշտ է գործի հետագա ընթացքի համար:

Այսինքն, քննարկման առարկա հանդիսացող իրավիճակում, Փաստաբանը ստացել է լիազորագիր՝ այդ թվում ՀՀ նոտաների մոտ հանդես գալու համար, սակայն ինչպես հայտնել է կարգապահական հանձնաժողովի նիստին, չի ունեցել նոտարական կարգով հաստատված լիազորագիր, որպիսի պայմաններում ոչ միայն պարզ չէ, թե ինչպես պետք է գործեր Փաստաբանը նոտարի հետ հարաբերություններում, այլ նաև նշված հանգամանքը բացահայտելու պայմաններում ինչ գործողություններ է ձեռնարկել առկա խնդրի մասին Դիմողին տեղեկացնելու և դրան լուծում տալու ուղղությամբ, ինչը սակայն չի ապահովել:

Նման պայմաններում, Հանձնաժողովը, գնահատելով սույն կարգապահական գործի քննության ընթացքում ձեռք բերված նյութերը, ինչպես նաև Դիմողի ու Փաստաբանի կողմից ներկայացրած բացատրությունները և ապացույցներն իրենց ամբողջության մեջ, գտնում է, որ փաստաբան Նարինե Բագրատի Մկրտչյանի վարքագծում **առկա են Օրենքի 19-րդ հոդվածի 1-ին մասի 1-ին և 2-րդ կետերի, ինչպես նաև Կանոնագրքի 2.7.2-րդ, 3.5.5-րդ և 3.6.1-ին ենթակետերի պահանջների խախտման հատկանիշները:**

8. Կարգապահական տույժի ընտրությունը.

Անդրադառնալով նշանակվող կարգապահական տույժի տեսակին՝ Հանձնաժողովն արձանագրում է հետևյալը:

Օրենքի 39.10 հոդվածի 1-ին մասի համաձայն՝ փաստաբանի կարգապահական պատասխանատվության հարցը քննելուց հետո փաստաբանների պալատի կարգապահական հանձնաժողովը կարող է փաստաբանի նկատմամբ կիրառել կարգապահական տույժերի հետևյալ տեսակներից մեկը, բացառությամբ սույն հոդվածի 3-րդ մասով նախատեսված դեպքի.

1) նկատողություն.



2) խիստ նկատողություն.

3) լրացուցիչ վերապատրաստման դասընթացներին մասնակցել.

4) տուգանք.

5) փաստաբանի արտոնագրի գործողության դադարեցում:

Օրենքի 39.10 հոդվածի 2-րդ մասի համաձայն՝ փաստաբանի նկատմամբ կիրառվող կարգապահական տույժը պետք է համաչափ լինի կատարված խախտմանը: Կարգապահական տույժ կիրառելիս փաստաբանների պալատի կարգապահական հանձնաժողովը հաշվի է առնում նաև խախտման հետևանքները, փաստաբանի անձը, մեղքի աստիճանը, առկա տույժերը, փաստաբանին բնութագրող ուշադրության արժանի այլ հանգամանքներ:

Վերը նշված իրավական նորմերի համակարգային մեկնաբանության արդյունքում Հանձնաժողովը հանգում է այն եզրակացության, որ Պալատը հանդիսանում է փաստաբանների մասնագիտական, ինքնակառավարվող միավորում, որի խնդիրներից մեկը փաստաբանների իրավաչափ և փաստաբանի վարքագծի կանոններին համապատասխանող վարքագծի ապահովումն է, որը դրսևորվում է Հանձնաժողովի կողմից Օրենքով սահմանված կարգով փաստաբանին կարգապահական պատասխանատվության ենթարկելու գործառույթի իրականացման մեջ:

Օրենքով հստակ նախատեսված են կարգապահական պատասխանատվության միջոցների այն տեսակները, որոնք Հանձնաժողովն իրավասու է կիրառել կարգապահական տուգանքների նկատմամբ: Ընդ որում, Օրենքում ամրագրված են փաստաբանի պատասխանատվության անհատականացման համար կիրառելի չափանիշներ:

Օրենքով Հանձնաժողովին վերապահված կարգապահական գործառույթից և այդ թվում փաստաբանի նկատմամբ կարգապահական վարույթ իրականացնելու և կարգապահական տույժ կիրառելու իրավազորությունից հետևում է, որ Հանձնաժողովն ոչ միայն իրավասու է, այլև պարտավոր է յուրաքանչյուր դեպքում իրականացնել փաստաբանի կողմից կատարված արարքի որակում Օրենքի և Կանոնագրքի շրջանակներում և դրան համապատասխան՝ նշանակել համապատասխան կարգապահական տույժ:

Հանձնաժողովը հաշվի է առնում փաստաբան Նարինե Բագրատի Մկրտչյանի անձը բնութագրող հանգամանքները՝ այդ թվում նաև կարգապահական տույժերի բացակայությունը, ինչից ելնելով նրա նկատմամբ կիրառում է՝ «նկատողություն», կարգապահական տույժի տեսակները:

Ելնելով վերոշարադրյալից և ղեկավարվելով «Փաստաբանության մասին» օրենքի 11.1-րդ հոդվածի 3-րդ մասի 1-ին կետի, 39-րդ հոդվածի 1-ին մասի, 39.7.-րդ հոդվածի 5-րդ մասի 1-ին կետի, 8-րդ մասի և 39.10.-րդ հոդվածի 1-ին մասի 1-ին կետի պահանջներով Հանձնաժողովը՝

Ո Ր Ո Շ Ե Ց՝

1. Փաստաբան Նարինե Բագրատի Մկրտչյանի (արտոնագիր՝ թիվ 2479) նկատմամբ կիրառել կարգապահական տույժ՝ «նկատողություն»՝ «Փաստաբանության մասին» օրենքի 19-րդ հոդվածի 1-ին մասի 1-ին և 2-րդ կետերի,



ինչպես նաև Կանոնագրքի 2.7.2-րդ, 3.5.5-րդ և 3.6.1-ին ենթակետերի խախտման համար:

2. Հանձնարարել Հանձնաժողովի նիստերի քարտուղարին՝ սույն որոշման մասին իրազեկել կողմերին:

Ծանոթություն. Սույն որոշումը կարող է բողոքարկվել ՀՀ փաստաբանների պալատի խորհուրդ կամ դատական կարգով այն ստանալու օրվանից մեկամսյա ժամկետում: Սույն որոշումն ուժի մեջ է մտնում այն Փաստաբանի կողմից ստանալու հաջորդ օրվանից:

ՀՀ փաստաբանների պալատի
կարգապահական հանձնաժողովի
նախագահ՝

Թիվ ԿԳ-25065-2-Ա
16 հուլիսի 2025թ.
ք.Երևան



Տաթևիկ Շալջյան